

本朝分省人物考

人物考卷之九十一目錄

河南南陽府

唐俊

鐵鉉

宋釭

鄭剛

朱昇

張鵬飛

侯諒

焦顯

焦宏

李賢

周宗

胡瑞

張景純

王鴻儒

柴昇

徐茂

居書

蕭麟

熊紀

任賢

牛鳳

藍瑞

衛道

張苾

王鴻漸

宋伊

郭良

張誦

霍達

張沂

史筆

蘇文

本朝京省人物考卷之九十一

河南南陽府

唐俊

唐俊南陽人誠信廉介始終不渝洪武初授兵馬指揮拜監察御史持部使者節叅預戎機以政事著稱超拜福建右叅政

鐵鉉

鐵鉉鄧州人洪武中國子生授禮科給事中調五軍斷事奏對詳明上喜賜字鼎石藩府坐法刑官久鞫不能奏當上屬鉉立決上益喜凡兩法司疑

獄盡屬鉉未幾陞山東叅政建文二年李景隆駐德州鉉督餉飛芻挽粟水陸並進軍興不乏五月靖難兵圍濟南甚急鉉暨徐將軍盛統兵宋叅軍高僉憲等悉力防禦令軍民詐降開城門候 文皇入急下鐵版幾中比出戰令軍士噪罵 文皇大怒攻至秋七月不能克舍之南去宋叅軍說鉉曰濟南天下之中北兵今南去其留守北平者類老弱且永平保定雖叛諸郡縣堅守者實多郭布政輩書生大叅公能出奇兵陸行抵真定南朝諸將潰逸者稍稍收合不數日可至北平其間豪傑有聞義而起者大叅公便

宜署部號令招徠之北平可破也北平破北兵回顧  
家室必散歸徐沛間素稱驍勇大叅公檄諸守臣倡  
集義勇候北兵歸合南兵征進者晝夜躡之大叅公  
館穀北平休養士馬迎其至擊之彼腹背受敵大難  
旦夕平耳鉉以軍餉盡於德州城守三月士卒困甚  
而南將皆駑鈍無足恃莫若固守濟南牽北兵使江  
淮有備北兵不能越淮歸必道濟吾邀而擊之以逸  
待勞全勝計也乃設宴天心水面亭犒問辛苦述賦  
賡歌激發忠義未幾又有東昌之捷建文以却敵之  
賞賞鉉進布政使再陞兵部尚書叅盛庸軍務賜金

幣鉉入謝京師賜宴饋粟肉小河之捷中原震動  
文皇欲北還以諸將言再戰得勝遂長驅渡江鉉感  
憤欲自裁 文皇登極鉉尚擁殘兵駐淮南已而擒  
鉉至不肯屈令一顧終不可得割其耳鼻竟不肯顧  
劈碎其體至死罵不絕聲時年三十七子福安戍河  
池康安先卒父仲名年八十三母薛安置南海

宋 鈺

宋鈺唐縣人洪武中舉人材知杞縣廉慎有爲治行  
超卓擢授監察御史執法不阿不避豪右陞知南雄  
府轉金華俱有賢名

鄭剛

鄭剛南陽人天資英邁質直無僞家貧嗜學洪武中  
釋褐胄監署廣西布政使事尋改兗州知府留心民  
瘼均田稅正版籍有遺愛在民爲時所重持節巡視  
江淮救荒撫民踰年卒于官洪熙初贈工部尚書制  
稱其資稟純寔蹈履清慎夷險之際一心不渝

朱昇

朱昇舞陽人洪武中由進士授行人司行人砥礪名  
節務存大體奉使安南不辱君命尋擢廣東道監  
察御史正色立朝糾彈不避權奸凜然有桓典之風



宋幾卒于官

### 張鵬飛

張鵬飛唐縣人初名九萬洪武二十年以耆宿聽宣諭上問唐鄧動靜近日如何鵬飛應對稱旨賜今名字以九萬授戶部郎中廉勤清謹時有里商餽鴨子者強其家人受之鵬飛怒詣朝自劾上笑曰張郎中何乃至此仍賜鈔二十貫尋陞平涼知府未行以明刑命錄大理寺囚三月讞獄平允尋卒于京特賜鈔一百二十貫以資歸葬

### 侯諒

侯諒舞陽人體貌魁梧穎悟過人讀書攻苦貢入太  
學時高廟勅吏部簡拔風憲而諒與焉立朝風裁  
凝峻有激揚之志纔踰四年擢安南守值遠夷弗庭  
諒日夕惶惶屯聚士馬多方訓練隨機應敵民賴以  
安朝廷嘉其績褒封之未幾致仕

焦顯

焦顯字宗仁南陽人爲諸生時居母憂有司以入試  
當服闋迫之行弗從永樂甲午領鄉薦歷易州訓導  
轉府教授年四十致仕平生邃於理學旁通星曆地  
理醫卜力田甘隱謝絕公庭頃白蓮社作孽招累千

人顯將招冊焚之合境安帖不啻古渡蟻者云

焦宏

焦宏字克明葉縣人性至孝篤學永樂辛丑進士拜  
監察御史守正不阿時都御史顧佐馭下嚴御史有  
不謹禮法者皆罷斥獨善待之常出按貴州貴有疑  
獄不決論死者百餘人察其實以聞皆釋免坐者十  
人而已公署相傳有妖前御史皆避正寢不敢居宏  
處之恬然陳都督鎮鳳陽行有違法者人重誣之欲  
寘之死地宣帝疑之命擇御史之賢且明者往廉  
問以命宏至則爲直其誣而坐以所當罪得不死謫

戍邊由是日益有名人有受誣不能白者皆以得遇  
爲幸壬子陞江西按察副使人謂江西俗健訟宏曰  
吾知其人多讀書識道理吾當以理論之訟無難決  
者於是惟折之以理不尚嚴酷人亦感其德無不服  
從獄遂清省江西連歲歉積逋稅藩府病之吏部侍  
郎趙新任總督奏委宏以循撫之民皆歡趨事以辦  
治己未陞江西右布政使益務寬厚不事苛察下吏  
中有才行者累疏奏進有起自末僚而爲縣令者九  
江歲納蘆柴此地不產乃斂錢於民買自他所逋負  
歲積民益困踣乃爲奏免重新南昌府學修公署正

堂及吏舍皆捐俸以倡僚屬故不勞而集每以公事  
行縣寬而不縱嚴而不殘吏畏而民愛焉九江濂溪  
書院久廢地址爲人侵軼查復其地更建祠宇有與  
鄉薦而貧不能赴春官者咸厚以贍之辛酉徵爲戶  
部右侍郎本年閩浙蘇松半臨海濱寇往來海中伺  
便抄掠上命往視閱諸軍修城堞備戰艦防守之  
法有當因革增損者悉以便宜行事政令一新寇不  
得爲害蘇之嘉定民有田數百畝已歸之官而稅尚  
在民乃蠲其稅甲子閩中復開銀場又命往視課煩  
重者請減之以利民乙丑上以陝西緣邊皆宿重

兵俱仰食內郡河南濱陝多積粟而諸衛多屯田慮有名無實復命按視其廩庾考校其邊獲奸弊盡革儲特以充正統己巳詔征叛賊思機發而以宏主餽運抵金沙江奉命謹甚冒瘴癘以進軍不乏食而身則病矣然尤力疾終其事師還浮三峽道荆襄以朝京師因家南陽葉縣以困憊弗堪少止求醫藥而疾加劇不能就道踰數月卒訃至上深悼惜之命禮部致祭工部爲治墳塋宏盡心朝廷遇事勇果爲之必盡其方不擇利害爲取舍與人交謙恭和厚言語恂恂有不當其意輒毅然自任不少回於得失故

於其卒也世多惜之

### 李賢

李賢字原德鄧州人生而氣宇凝重不妄舉止嘗得疾劇葉夫人危之有老嫗來視曰此非凡子也幸母以爲憂言已卽去明日疾愈人以爲神宣德壬子舉鄉試第一方宴鹿鳴有鶴數十旋繞廳上布政使李昌祺舉酒酬曰將必有名世之才乎癸丑舉進士命察山西河津蝗災時學士薛公瑄以御史家居賢往造之叩質所疑薛公亟稱之以爲英悟渾確非流輩可及英宗皇帝嗣統賢上疏言帝王之道在赤子

黎民禽獸夷狄未有赤子不得其所而先豢養禽獸者今京師韃官不下萬餘以俸言之指揮使三十五石而實支一石韃官則實支十七石五斗是韃官一員當京官十七員半矣况夷狄人面獸心一旦有警其勢必不自安前代五胡之亂可不鑒哉乞勅兵部漸次出之於外不惟省國家無益之費亦可以消未萌之患蓋賢筮仕卽有志當世如此已巳之變畿內韃官羣起應虜賢言始驗正統丙辰授吏部驗封主事會有旨文武誥勅三年不得請必候九年者賢以職守所在復上言此獎勵臣下之良法若候



九年則得者恒少不得者恒多廉貪不分勸懲不立  
乞仍舊便後卒從賢言賢以人才繫太學而太學因  
元之陋上疏言 國家建都北京以來所廢弛者莫  
甚於太學所創新者莫多於佛寺舉措如是可謂舛  
矣若重修太學雖極壯麗不過一佛寺之費請及時  
修舉以致養賢及民之効後數年詔新太學實自賢  
發之乙丑陞考功郎中踰兩月丁母憂久之轉文選  
郎中候終制赴京賢官吏部更三任每公暇手不釋  
卷尚書王文端公直以公輔期之而少師楊文貞公  
每以不識賢爲歉南陽知府陳正倫文貞友也因要

賢往見之賢不肯曰無一面之雅而造門是求知也  
士大夫兩賢之已巳秋虜寇大同時中官王振用事  
力主親征吏部侍郎當扈從以疾告賢代之行師  
潰於土木英宗北狩扈從官多預其難賢瀕死而  
還景泰初年上正本十策曰勤聖學顧箴警戒嗜慾  
絕玩好慎舉措崇節儉畏天變抑貴近振士風結民  
心奏入命翰林繕寫置左右焉辛未虜遣使求通  
好有詔絕之令廷臣共議長策賢上言虜所以敢輕  
中國者恃其弓馬之強而以中國長策惟有所謂戰  
車火鎗然用得其法又在將士者何如今朝廷於

將帥特彰剖封之典於士卒頻加賞勞之恩待之厚  
矣然不能一爲國家復讐雪耻何也乞飭勵中外將  
臣務期功實著明賞罰允當 上嘉納之是冬陞兵  
部右侍郎壬申奉 命察四川有司之不職者癸酉  
還京轉戶部右侍郎賢以虜欲無已不宜終徇上疏  
言北酋也先近殺其主併吞諸夷包藏禍心其志非  
小若只聽其講和貢馬圖金帛之利蔑敬順之誠增  
數冒名曾無定約竭生民之膏血供無厭之貪求醜  
類日見盛強中國日加罷敝惟 陛下奮仁者之勇  
勵總戎之臣以振中國之威則夷狄之心自懾方來

之患自弭 詔下兵部少保于謙謂李賢言誠爲正  
論請下其章以勵邊臣甲戌轉吏部右侍郎詔頒君  
鑑錄於羣臣賢擇其中善可爲法者二十二君又詮  
其最切者數事曰鑑古錄上之 英宗復位一時輔  
臣多竄殛乃以人望召賢兼翰林院學士入內閣典  
機務未幾進吏部尚書兼官如故左右欲以汪后殉  
葬者 上問武功伯徐有貞及賢賢言景泰初汪后  
卽不得志况二女皆幼可憫臣愚以爲宜厚遇之  
上憮然以賢言爲是山東奏民饑雖得內帑銀二萬  
而不足 上復召有貞及賢議有貞持不可曰散銀

有弊無益饑者賢言天下之事未嘗無弊顧奉行何如耳散銀有弊而不貸是視民饑死而不拯也因噎廢食豈爲人上之理 上深以爲然命增銀四萬兩民賴全活甚衆時太監曹吉祥忠國公石亨以迎上復辟爲已功竊弄威福 上漸不能堪賢自念遭遇不偶凡事一以至公處之吉祥與亨滋不悅亨率兵西征御史楊瑄劾吉祥與亨縱家人奪民田 上嘉其敢言命吏部識其名將擢用之亨還與吉祥謀此必有貞及賢所使相與慙於 上言已有迎復功爲有貞賢等所傾將俾臣等無噍類因伏地流涕不

已乃諭 旨言官劾賢等并下獄其日風雷雨雹大作損殿宇公署瓦木甚異 上知天怒在此亨等反言上天亦怒賢等雖強解釋然不自安明日言於

上釋之詔俱謫外任賢得福建布政司右叅政將辭吏部尚書王翱是日得專對語有間 上曰李賢與

有貞雖同事未嘗阿比王翱因頓首力言賢淳謹可大用 上領之卽日留爲吏部左侍郎踰月承天門

災 詔復賢尚書學士賢上章懇辭不允二年賜玉

帶以優寵之 皇太子將出閣賢請擇學術端良之士爲輔導乃上劉誦等數人爲春坊官 上仍命賢

總之日授書正字於文華殿 上思建庶人幽大內  
六十年欲赦之左右多以爲不可召問賢賢曰 陛  
下此一念 太祖在天之靈實臨之堯舜存心不過  
如此 上意遂決遣中官衛送居之鳳陽出入自便  
初石亨以文臣總軍務於邊使武臣不得逞因請罷  
之居無何邊檄驟然 上悟其非命賢舉可任巡撫  
者數人皆克堪其職尋命賢督修大明一統志賢偶  
患足病不能造朝 上遣御醫來視又數遣太監安  
寧以政務問賢旬日方愈入謝御史劉濬劾太傅安  
遠侯柳溥敗軍之罪 上怒曰與賊遇安能保其無

損且將校聞濬言豈不解體將遣人繫之賢曰耳  
之任職所當言惟明主用其是舍其非而已不當見  
譴石亨等遂乘間讒賢以爲阿護文臣會 上知賢  
已深譖卒不行而大悟賢言爲是濬得薄責已而溥  
還自陝西 上曰溥爲主將畏縮致敗不罪之何以  
警衆諭言官廷劾之奪其太傅景泰三年度僧數萬  
及天順二年如期來集賢言於 上曰此輩有損無  
益宜俟十年一度著爲令初 上於便殿屏人謂賢  
曰吉祥好預國政聞四方奏事者必先造其門奈何  
賢曰自古人主權不可下移若 陛下每事自斷惟



公道處之則彼漸不敢爾而趨附之人亦自少矣

上曰朕意亦然會石亨敗遽置於法因問賢迎復事

賢曰當時亦有要臣臣不敢從上怪問何也賢曰

天位乃陛下所固有若景泰不起羣臣表請復位

名正言順何至以奪門爲功奪之一字何以示後此

輩實貪富貴非爲社稷計倘景泰先覺亨等何足惜

不審陛下何以自解幸而事成得以貪天之功然

天下人心所以歸向陛下者以正統十數年間凡

事減省與民休息所致今爲此輩損大半矣上竦

然大悟詔凡以迎駕奪門冒功陞者四千人悉褫

中外肅然前此賢父以封贈 恩誥 闕謝至是  
陛辭 上特賜寶鑑三千貫因顧謂賢曰先生已盡  
天倫之樂乎賢頓首曰臣父子所以有今日者皆  
陛下之賜是冬賜甲第一區賢上章懇辭 上曰聞  
卿舊宅去朝頗遠特賜近居以便宜召所辭不允遷  
居之日 上及 皇太子皆有落成之賚賢以朝覲  
黜陟之典往往虛應故事無以示懲勸言於 上  
能不職者數百人旌異者十人賜宴禮部 上命賢  
與尚書王翱主之四年庚辰虜酋孛來寇大同守將  
失利遂深入鴈門烽火徹於京師民驚遁不可止賢

請急發兵遣兩都督將之出鴈門倒馬二關旬日始  
定五年辛巳虜西寇涼州莊浪賢知 上以虜入爲  
憂陳邊事五條 上從之遣懷寧伯孫鏜率兵往禦  
時江南北太水而加以師旅賢言宜布寬卹之典遂  
罷天下所取花木板枋之類及暫免采柴追馬清匠  
刷卷諸事而采柴一歲省銀三十餘萬兩吉祥從子  
昭武伯欽殺人 上因下詔戒諭勲舊欽懼與吉祥  
養死士謀不軌欲幽 上於南宮而立 皇太子因  
西師行乘機入內爲亂朝臣當道或有憾者戕害之  
擊賢傷首及耳且持賢謂曰某等迫於讒聞不得已

為此請入疏以申救賢曰爾旣殺仇償怨能止戈反  
正我當言之 上得疏乃知賢在甚喜旣脫於難

上急召之入宮手疏曰逆賊就擒此非小變宜詔天  
下一切不急之務悉皆停罷且言自古治朝未有不  
開言路者惟權奸欲塞之以遂其非由是陷於大惡  
而不悟自石亨等排黜臺臣言路閉塞其流遂至此  
極 上悉報可下寬卹條而以開言路殿焉 上念

賢忠勤下 勅加太子少保賢上章懇辭不允賢以  
西師未解而京師有變大軍不可輕出請復都御史  
王竑俾與兵部侍郎白圭分道禦虜虜引去邊臣請

罷兵而議者懼有後警賢上言兵出在外可暫而不  
可久暫則爲壯久則爲老且虜安能保其不來若慮  
其復來更無休息之期况人民供輸疲困已極宜趁  
河開班師使民得屯種爲便 上命廷議卒從賢言  
聖烈慈壽皇太后崩 上見賢所服斬衰與衆異取  
視之乃知賢服制合古卽以賢服著爲法命宮中悉  
易之孟冬享 太廟適大喪禮未終 上以問賢言  
宜俟釋服後庶人情事理兩安 上曰微公言幾舛  
於禮七年春 上足疾不視事 賢曰大祀將至而  
疾未愈欲遣官代行可乎賢曰亦湏至壇所雖不能

行禮人心亦安 上至齋宮召賢曰朕惟俯伏艱於  
起身欲令一人扶之何如賢曰 陛下能力疾行禮  
尤見敬天之誠遂竣事而還二月晦夜賢聞空中有  
聲明日密疏曰傳言無形有聲謂之鼓妖上不恤以  
而有此異惟 陛下憫念黎元凡一切不便於民者  
悉皆停罷則災變可弭 上覽之卽召賢曰此事正  
須先生言先生不言誰復言者其具寬恤事條密封  
以來賢遂疏十事一請清淹禁罪人二止銀場煎辦  
三停歲造紙劄四蠲被災糧稅五弛芻米之徵六罷  
虧損馬匹七飭邊臣撫卹兵民八命有司存恤流移

九戒御史察貪吏十禁外官因事苛斂 上曰朕諦  
觀之皆實惠也宜卽詔天下賢又請罷江南所造段  
疋及燒磁器清錦衣衛所監罪人止各邊守臣進貢  
停內外買辦採辦 上不從賢執之數四止取前十  
條行之左右見力爭皆寒心同列亦爲賢懼賢曰古  
之大臣知無不言今雖不能盡然至若利害繫於安  
危者豈可默默以苟祿位然 上聖明亦不以爲忤  
也是時錦衣衛指揮門達有寵於 上專理詔獄且  
兼緝事於中外道路洶洶相視以目賢嘗以爲言達  
衛之會指揮袁彬爲所誣下獄有楊暄救之 上命

達達訊達欲并傾賢休暄使誣賢爲草奏狀狀牽捕  
數十人勢危甚上命廷鞠之其人遂吐實曰此達  
所教也賢以事白上疏力辭且以知足不辱知止不  
殆爲言上不允曰此細故無用介意八年春上  
不豫久之疾劇命中官以遺詔示賢十七日上賓  
天後五日憲宗嗣位有欲專致隆於上生母者  
賢曰天子新卽位四海顚望凡事宜悉遵遺詔庶  
幾順天理服人心於是尊皇后爲慈懿皇太后  
貴妃爲皇太后尋進賢少保吏部尚書兼華蓋殿太  
學士未幾門達以附中官謫遠方又爲言者劾其欺



國故殺諸罪謫戍嶺表不知者以謂出賢意其黨相  
與爲匿名文書指賢姓名欲中之賢不自安懇乞退  
休 上不允下令禁議謗者時災異屢見賢請出宮  
人以昭聖德又上疏言治安之本在於君德輔養君  
德又在左右前後皆老成端謹之人若喜生事工逢  
迎專以諛悅供耳目之玩者望即日退出毋令隨侍  
賢以疾在告 詔免早朝尋降勅命知 經筵事及  
總修 英宗睿皇帝實錄成有司請造鹵簿已得  
旨賢聞之亟入言先朝所造車駕尚有貯內庫未經  
御者今 恩詔方頒百姓甦息未久奈何復爲此

上卽日寢其首 皇后吳氏之廢小人乘機欲害賢者益甚 上命錦衣衛嚴禁之且遣衛士夜宿賢第護賢以行有內直將軍愬天順初因入直迎 駕而陞冒功者今一切褫職非法意 上念其久於役特復之而以迎駕奪門陞者紛然入愬不已賢言於上曰自石亨輩此舉之後人以得富貴之易貪利者憚幸有事宜早治之且請復故少保于謙等官賜祭改葬以雪幽枉 上亟是賢言命兵部按其以迎駕奪門陞者自太平侯張瑾與濟伯楊琮以下俱奪爵蓋賢欲消患於未萌故於 上卽位極言之由是洵

海者哀息有識者至今以爲難丙戌二月丁父喪

詔起復賜賻甚厚復賜素品備途中食用而令有司

爲營葬事賢累疏請終制不允遂遣太監林興輔行

賢聞故鄉歲祲加以師旅請止官營葬不從旣抵家

襄事興卽日促賢上道五月至京師入見上慰勞

有加賢退卽疏言乞俯察至情矜從守制詔令勉

起就任賢復疏言臣累訴衷情而陛下曲加勉諭

徒重臣之慚增臣之罪詔卽日就任慎勿再言又

遣中官至第道上意乃供職賢因上道中往來所

得軍民利弊八事大約乞重守令之選毋拘常格以

免墮政留河南所運之粟以備民饑停通州諸衛薪炭之徵以蘇民困蠲江南馬戶而復本處民戶代之以均勞役增天津諸衛及河南榮澤新鄉諸處驛遞以便往來開衛學軍生歲貢以振淹滯上卽命所司議行賢有所陳奏俱裨主德民瘼上方虛已以聽而賢感疾浹旬不愈上遣中官臨問賜尚食及命御醫日夕診視報疾狀凡三閱月疾亟語弟監察御史讓及子璋惟以國恩未報史事未成爲念以是年十二月卒享年五十有九贈大師謚文達賢少卽有志聖賢之學爲諸生時督學者問所志對曰爲

學之道當如周子言蘊之爲德行行之爲事業其人  
大異之在吏曹大書箴銘於座右與學士薛瑄相厚  
善務以性學相切劘而窮理之功益密立朝四十年  
不立黨與惟守一誠自以受知 英宗遂身任天下  
之重知無不言天下亦倚之爲重雖遭讒罹謗處之  
泰然 英宗嘗論景泰不與大臣接言賢曰自古明  
君未嘗一日不與大臣商確治道所以天下常安先  
儒謂接賢士大夫之時多親宦官官之時少於君  
德方有益又言朕自復位以來未嘗一日忘在南城  
時每以此戒左右賢曰安樂不怠患難古昔聖賢之

君存心正如此又言飲食隨分曾不揀擇衣服亦隨  
宜雖著布衣人不以爲非天子也賢曰如此節儉尤  
見盛德若朝廷節儉天下自然富庶英宗每爲首  
肯愛惜人才惟恐弗力而以獎恬退厲名節爲先耿  
公九疇及軒公輓皆以廉介聞首舉耿爲都御史軒  
爲刑部尚書未幾二公以見排去位又屢言於上  
而還之年公富亦爲亨姪彪所誣陷及亨敗力言富  
有執守可大用遂起爲戶部尚書上嘗謂賢曰左  
右多不悅富者賢曰不悅正見其賢禮部侍郎員缺  
禮部郎中李和求近習薦陞上問賢何如對曰不

知其人所知者學士李紹可任此因進言邇者士  
風不立多夤緣以求進如若用紹請於黼座召吏部  
面命之庶幾士類知警上從之命下之日傾朝懼  
然其後任事大臣賢多所薦拔人不及知之反有訾  
賢者或以告賢賢曰吾知用其才耳三選庶吉士儲  
養於翰林親加督教如愛子弟與學士呂文懿公原  
陳公文彭公時相處十餘年未嘗失辭色每語具以  
忠言相告而於講學論政至終日忘倦人有善若已  
出不白之不已兩廣兵興編修丘濬實廣人具嶺南  
事宜告賢賢繳奏言可用請付軍中爲平賊之助遇

天變民瘼憂形於色每以裁抑浮費蘇息民力爲本  
謂內帑財物非濟兵民則人主必生侈心而移之於  
土木禱祠聲色之用自賢柄政前後發內帑銀救荒  
卹邊凡數十萬計人有急難以身救之而於植臺諫  
慎刑獄尤惓惓焉成化初言者歷詆中官之惡謂不  
可使與國政得補外而或咎賢不申救者賢曰此事  
何可激也甘露之變黨錮之禍諸君獨不知之天順  
中宗室臨川王弋陽王前後爲緝事者發其陰事已  
而多涉虛因召問賢賢曰觀此則其餘所枉多矣  
法司雖知其枉而不敢辯乞明詔理官不許畏勢



避嫌實傷和氣 上乃召三法司面加戒飭中外咸

悅凡 朝廷大政令涉於軍情邦計者必經賢議而

後決虜酋孛來近邊有言傳國璽在其處石亨請發

兵乘機掩取之 上爲之動賢曰頻年災荒府庫空

虛兵民困極宜與休息且虜近邊而未嘗犯塞無故

伐之必賈釁况秦璽亾國之物亦不足寶 上矍然

罷之內府奏乏金用 詔下戶部議請以蘇松嘉湖

四府歲折糧銀折金五萬兩賢曰 國家財賦仰給

東南而金非其所產今欲折金價必湧貴聞雲南諸

夷有歲辦金銀若以銀折金亦足以充國用松藩羗

寇亂已勅三司調兵勦之久不下賢曰三司頡頏牽制自不能成功若 朝廷命一大臣統之則事定矣因薦都督謝貴爲將而寇始靖凡冊后妃與諸王大喪大祀婚冠之禮及 憲宗之初親耕視學諸大典禮悉命賢與禮官增損其儀式而後行白金文綺上尊珍饌與夫四方貢獻內帑圖書賜賚無虛月賢每以盈滿爲戒取小旻詩中語扁其堂曰臨深以寓安不忘危之義雖位及三孤不治田宅不鬻女侍爲學務實踐不爲空言因自號浣齋孝友敦睦之行有人所難能者所居圖書左右口誦手錄雖老不懈每有

得卽識之每染翰則援筆立就不事瑯琊所著有詩  
文若干卷

周宗

周宗字繼先裕州人成化乙未進士知鹽山貴池二  
邑大有政聲擢陝西道監察御史按遼丰采嚴整貪  
酷畏懾宦監侵侔軍食率以爲常宗痛刷滌軍民稱  
快嘗自言曰寧爲法以受禍不陷人以要名仕終浙  
江按察司僉事

胡瑞

胡瑞字良禎內鄉人成化甲辰進士選授禮科給事

中累官右副都御史巡撫山西地方爲人老成持重  
進言得體所在有聲卒賜祭葬

張景純

張景純字文粹南陽人中成化丙午鄉試天資穎敏  
志向精專凡天文地理性命道德之學無不精究曉  
悉著書立言名重天下爲當時學者所宗王文莊夙  
負重望每嘆服其人未仕而卒

王鴻儒

王鴻儒字懋學南陽人成化二十三年進士聰悟天  
成書過目成誦作字端勁有古法里人有爲府史者

嘗以鴻儒所書置之府中知府段堅偶見而奇之史  
對曰里人王生書也堅卽召見曰子風神清徹豈塵  
埃中人卽留讀書府中續食授衣遣入郡學爲諸生  
提學副使陳選異其文曰此生文章經世非直舉業  
未幾發解河南第一筮仕南京戶部弘治九年僉事  
提學山西十五年進副使提學在晉九載 泰陵勵  
治思賢嘗召見劉大夏論人材曰藩臬中如王鴻儒  
他日可大用大夏對曰此人才學不易得誠如 聖  
諭正德改元乞致仕賜誥四年於家拜國子祭酒不  
數月憂去七年又拜南戶部侍郎十年召入吏部歷

左右侍郎嘗曰惟誠與直能濟國事趨名者亦趨利  
於社稷生民無益也時吏部尚書陸完有才名與宸  
濠通亟稱夏忠靖王忠肅二公賢可師法完意不說  
十四年三月陞南戶部尚書是歲六月宸濠反完敗  
鴻儒督餉留都至九江聞變遡流欲入武昌約守臣  
起兵討賊又聞康陵南巡益憤懣疽發背卒謚文  
莊博文多識凡祖宗設政任人及先輩立朝行已  
歷歷能言至論時務決成敗可否如探囊指掌待物  
開誠不問人私人亦不敢以私問也弟鴻漸亦舉河  
南鄉試第一官至山東右布政使致仕廉靖有吏才

柴昇

柴昇字公照內鄉人幼知嗜學十五補郡庠生歆粥讀書寒暑靡廢常受知郡守段堅成化丁酉舉於鄉不第游太學力學十年丁未始舉進士是年選擢工科歷左右給事中特爲孝廟眷注調兵科歷十有三年在諫垣卽以死直爲心謂官祿非夙志也弘治庚戌彗見東井下詔求言首疏十有五事急切時弊上首爲嘉納辛亥北京山東河南水旱有詔亟求時政得失疏陳四事甲寅工部營造皇親府第人心怨詛劾之疏留中明日宣詔面諭片言霽

威 詔用以寢乙卯四月番僧領眞占竹黃緣行取  
中外騷動禮部劾科道又劾 上不之聽昇乃上一  
疏反覆千萬言欲恤人言杜無益 上讀之大悟其  
果欺罔也 詔用中止天下誦之丁巳丁內艱庚申  
起復掌兵科適大同虜逼平江伯陳銳將兵百萬老  
師玩寇蠶食日費中外相視無敢言者奮筆舉劾衆  
色懼明日奉 詔取回偏裨以下各置以法邊境用  
清他如革畫工止僧度定柴夫至今著爲令辛酉陞  
山東叅政奉 勅督糧巡歷所至查革奸弊興學勸  
農賊吏望風引去水旱租稅已經奏復而戶部邊警



檄徵昇部運至京米麥草束原價糴鬻不足具論民  
 無餘力何以再徵庫無餘財何以再借論入得暫收  
 原價宣府龍門喜峰古北口諸倉亦各被區處官吏  
 稱便乙丑陞廣東右布政使革缺官皂隸銀貯之公  
 庫稽其出入人服其廉時十三村賊與良善雜處議  
 難進兵乃設法招諭俘獲罔寃捷聞 賜銀牌紵絲  
 衣二襲正德丙寅陞山東左布政使舟還荆襄官司  
 盛備夫騎至則行李蕭然途人興歎丁卯陞副都御  
 史巡撫江西會革改陝西振肅憲度聞者凜凜已而  
 陝西革總制三邊率聽制於昇令行禁止終任雖解

舍器物一以給官三年改吏部右侍郎四年轉左庚午冢宰逮繫攝部事督屬攜拱手自省閱凡所以壞選法者俱議請釐正法比畫一五年陞南京禮部尚書六年改兵部勅叅贊機務議陳兩都形勝粵自

祖宗朝迄今百數十年設官原有意義奈何承平旣久百度寢衰加以內府冗員四方饑盜歷數漢唐往迹要以救時弊收人心爲急務條十有三事率祛逆瑾餘孽具見施行自是不悅者滋衆繼以賊勢猖獗疏保國之策上遂以守備事悉委之殫竭心力會選官軍分布據守盜隨以息坐是病目乞休得旨

褒留壬申外艱繳勅奔喪中途及南京戒嚴僉議以奪情例檄差官遮留乃謂奪情其令典耶就檄答之東歸乙亥吏部以南京工部起辭弗允九月固辭乃奉俞旨優以月廩歲隸乘傳還鄉杜門謝客構亭後圃吟咏其中居常稽古課子崇正黜浮究心世務雖細靡遺暇則招舊傳觴澹於勢利非公事不入城府門逕蓬蒿干請絕迹婚喪不舉者力爲之助四方名賢至必造廬世廟入繼大統郊迓寵顧未幾詔起不果屢用言官論薦以幣醢存問卒贈加太子少保壽六十八

徐茂

徐茂字景芳新野人以成化進士擢雲南監察御史奉勅整理邊防按治淮揚等郡風聲赫奕成化三年再按京畿其貪壘不律者悉望風解去居道九載拾遺補過激濁揚清人稱其得體陞山西叅議入祀鄉賢祠

周書

周書字大經裕州人成化中由監生任陝西伏羌尹清廉自律秋毫無所取實倉廩以備邊化頑民以成俗當道奏白廉能以書稱首未幾卒縣祀于學宮

蕭麟

蕭麟新野人成化中以舉人授高郵訓導轉定州學正陞鹽城知縣制行端謹蒞政廉能孝友之風尤孚于鄉間及卒人猶誦之入祀鄉賢祠

熊紀

熊紀字時振南陽人中弘治己酉鄉薦壬戌進士歷知縣給事中陞湖廣叅議素履剛介問學老成識疏通達于爲政宦業方隆卒于官士論惜之

任賢

任賢裕州人正德六年以母喪家居適流賊至同知

郁采請協心拒守賢與采共招集其鄉兵三千人登城拒守城陷罵賊不屈遂遇害一家死者十三人巡按御史覈實以聞贈太僕寺少卿予祭葬仍廕一子爲國子生時正德八年六月

### 牛鳳

牛鳳葉縣人正德辛未進士試南宮選第六授驗封主事時黔國公應襲大賂冢宰求免入朝鳳執法不從幾被中傷止 武宗南幸被杖幾死後 世宗卽位錄言者功陞正四品爲太常值 承天門災遂自陳歸卒

藍瑞

藍瑞字伯麟鄧州人正德中舉進士任青州府推官  
蒞政廉明轉南京刑部郎鞠獄多所平反不避豪要  
陞知漢中府單騎赴任二年百廢具舉凡所設置皆  
爲數世之利瑞朴直自執不爲時所容比歸未嘗有  
餘貲平生所著有日省篇求仁錄名言錄淵南稿藏  
于家卒祀鄉賢祠

衛道

衛道字正夫葉縣人正德中舉進士授武昌府推官  
有治蹟徵爲南京刑科給事中會武廟南巡道抗

疏諫請 回鑾詞極懇切 上嘉納之累官南京刑部右侍郎清直之操終始不渝致仕卒

張 苡

張苡字延齡新野人由縣學生貢入太學正德間爲內黃縣丞操履清介持正不阿民有饋一雞斗米者苡却之曰吾俸可以養廉何忍剝吾民也尋陞交河令有異政益安淡薄父瓚聞之持米肉以助之且戒曰毋渝初心論者謂不愧古之良吏云入祀鄉賢祠

王鴻漸

王鴻漸字懋德南陽人中弘治甲子鄉薦第一登嘉



靖癸未進士初授大理寺評事決獄稱平出守廬州  
才堪治繁未幾調蘇州府及入覲通判解清被冤當  
黜乃正言力解一時京師甚重之既擢關南兵備擒  
獲巨盜馬興等數十人民賴以安歷官山東布政使  
問學該博惠政孚民致仕歸尤廉介絕俗與兄鴻儒  
中州稱爲雙鳳焉

宋 伊

宋伊字汝任裕州人嘉靖辛丑進士初知崑山縣年  
少老成強禦不畏諂練治體遠近稱賢未三載當道  
保薦者八上權爲戶科給事持正風駁有古諫臣風

以遷葬歸在道疾作而卒士民罔不痛悼

### 郭良

郭良舞陽人以監生授武清知縣政尚寬平民懷其惠時入覲道遇數寇行李盡被標掠從吏泣訴曰吾輩之物任取去天寒乞留吾尹衣被寇曰爾尹無乃武清郭知縣耶曰是寇遺之監司以爲有化盜異政上其事 賜勅褒旌尋陞銅仁判改衡州益精治體吏畏民服工部尚書翁公世資以侍郎謫守與良同寅深得其歡心贈別詩有知君不能薦深負長官羞之句後致仕家居坐卧一小樓足不履地者數年其

靜專之功類如此

張誦

張誦字記學鄧州人由歲貢歷晉州平定州判陞文水知縣時邊官有大獄不決誦承簡命一訊卽剖陞知定州嘗覆州縣地欺隱以均貧乏甦息酌贖銀市牛種招給流散復業民有再生張父之謠建正學書院贍給諸生創修陂堰利數百餘家人名其堤曰張公堤在郡八年盜賊屏息民爲立生祠入觀蒙 璽書褒獎爲直隸清官第一後歷韓府左長史以老致仕

霍達

霍達字成章裕州人器度凝遠雖燕居必衣冠危坐終日儼然由鄉舉任安化教諭誨生徒祁寒暑雨不輟也當道聞而薦之而守制還矣後補應城尋陞淮安教授復改登州前後四任終始如一造士多有成效巡撫等交章論薦欲爲提學僉事不果陞國子監助教卒于官貧不能歸祭酒周洪謨素重其爲人爲之經理歸葬

張沂

張沂字希魯鎮平人世居南陽以鄉薦除直隸鎮江

府通判權貴占據荻州佃人因而潛匿水寇劫掠商賈卽拏捕之權貴以書囑不聽竟寘之法一日獲盜賊巨萬長官欲以公用沂正言拒之遂獲嗔卽挂冠歸家貧不逮齊民鄉人咨嘆之

史筆

史筆字秉直南陽衛人性至孝父病劇嘗糞母卒遺命以白綾斂不得終身不服綾以鄉薦除山東武城令調襄垣守愛民民被其澤爭繪像祀之尋陞太僕寺丞馬政大舉年未艾卽引疾歸杜門不謁府者十一年撫姪讓產恤貧周匱人多義之以輿論申允入

祀鄉賢祠

蘇文

蘇文字子朴南陽人少孤貧事母至孝母病暑月思牛餽不可得遂終身不食牛族有遭變獨持數百金寄者逾數年封識宛然還之以鄉薦歷樂亭棗強知縣却常例革浮費杜請託釐積弊均賦清訟興學勸農尋擢國子助教民攀轅卧道留之轉岷府長史未幾謝政歸清貧如寒士誠無愧于古之孝廉云

人物考卷之九十二目錄

河南汝寧府

何德

趙好德

徐理

岳仲明

孫顯

王平

梁銘

衡岳

趙毅

尚禱

強宏

楊威

徐廷璋

李嵩

胡智

熊翀

李鸞

胡瀛

高鑑

閻倫

曹鳳

程文

張文佐

李遜學

熊槩

盧藝

劉紳

何景明

李緋

林時

王相

許達

蔡翠

馬錄

孔輔

朱紀



郭五常

楊來鳳

桂祥

馬敷

蔡光

本朝分省人物考卷之九十二

河南汝寧府一

何德

何德者光州人也至正末太祖隆興德仗策來歸從上定江左諸郡轉征吳楚屢立奇功授驍騎衛千戶吳元年七月沅陵人向珍八作亂德率兵討之至官廳嚴珍八以衆逆戰德擊敗之進拔其寨而斬珍八逆黨周文貴率划船三百餘艘復攻辰州德使別將與戰于西門外自將輕騎直抵其塞攻破之獲張千戶等百餘人文貴退保麻陽德追擊之又俘其

萬戶等四十四人文貴遁去是年拜虎賁右衛指揮  
僉事既定中原陞指揮同知率兵守遼東召還改虎  
賁右衛指揮同知尋擢大都督僉事洪武十三年改  
立五軍遂爲左軍都督僉事十七年扈從北征還以  
疾卒于家年五十二賜葬鍾山之陰追封廬江侯謚  
莊毅

趙好德

趙好德字秉彝汝陽人幼警敏能文章有經濟大志  
元季汝穎兵起郡縣多陷沒好德謂其妻曰今元運  
將終豪杰並起我觀東南有天子氣將往從之遂洒

泣以別自和陽渡江謁 太祖于金陵語合以儒士  
授峽州同知尋遷安慶知府飭兵治具屹然江淮保  
障歷六年陞戶部侍郎明年進吏部尚書嘗召與四  
輔官何顯周等至內殿坐論治道 上悅各賜錦衣  
一襲命工圖其像

徐理

徐理西平人國初從諸將定江右諸郡積官至永清  
左衛指揮僉事調營州中護衛靖難兵將下大寧理  
從間道詣軍門請見遂從 成祖戰于白溝河破雄  
縣滄州藁城定兩淮入京大小十餘戰皆賈勇先登

所向克捷累擢都督僉事壬午封武康伯賜白金文  
綺貂蟬冠服還守北京寬厚馭下士樂爲用永樂六  
年薨子禎嗣

岳仲明

岳仲明固始人宋鄂王七世孫也洪武初徙家于汴  
仲明少負清節隱居不仕嘗廬墓九年有司以孝廉  
舉朝廷三召不起賜號純孝先生今三召祠故址尚  
存所著有遺安集

孫顯

孫顯信陽人洪武丁卯領鄉舉卒業國子監 太祖

臨幸說書稱旨授主科給事中累陞工部尚書丁外  
艱廬墓三載鄉里推重之上嘗御闕樓睹欄楯上  
有紅光閃爍令人跡之則顯衣緋袍以督役也由此  
忌之會廷諍忤旨杖四十謫戍雲南密藉其家止水  
牛一頭茅屋數間使者還報上嘉歎召復原職至  
中途卒于是復贈八十金勅有司營塋事

### 王平

王平息縣人洪武中以國子生擢江西道御史陞陝  
西按察使文皇卽位召爲都察院右僉都御史坐  
事謫衛經歷用薦陞福建右叅政從英國公張輔征

交趾事平進交趾右布政使時清化府蠻賊梗化平  
與都督黃中往鎮其地民賴以安還至交趾卒平爲  
人氣剛不容物臨政頗刻而所至不受私餽交人至  
今頌之

### 梁 銘

梁銘汝陽人洪武末以父廕改補燕山前衛百戶革  
除間北平被圍銘拒戰甚力以功歷陞後軍都督僉  
事侍 昭皇監國于南京坐事下獄已而宥之命往  
廣東備倭 昭皇卽位陞都督同知鎮守寧夏封保  
定伯宣德元年從安遠侯柳升征交趾卒于道子瑤

襲父爵正統間征鄧茂七有功佩平蠻將軍印平湖  
貴諸苗景泰間進封保定侯出鎮陝西三邊成化間  
召還掌都督左軍府事薨追封蠡國公謚襄靖

衡岳

衡岳字世瞻西平人少以俊茂補郡學弟子員中河  
南鄉試遂升大學洪武三十年詔國子監選諸生通  
理道者赴詹事府議事六館之士咸推岳往岳敷陳  
時政切而不迂所司以聞擢廣東潮州府同知酌已  
惠民自常祿外餽遺一無取布衣蔬食不異寒士嶺  
海間翕然稱其廉三十五年遷西安府知府其清操



善政如在潮時丁內艱去職服闋改慶陽益以清白  
自勵民愛之如父母僚友諸婦嘗會飲岳之內子與  
焉在席者金鈿綺綉爛然而岳內子荆釵布裙而已  
旣罷頗不樂岳曰汝坐于何處曰首席岳曰旣坐首  
席又要服飾華美富貴可以兼得也耶慶陽人至今  
以爲口實永樂十年朝覲至京以言事忤 旨謫戍  
交趾慶陽西安二郡民千餘人詣闕請貰岳以終其  
惠不報 仁宗嗣位下詔求賢監察御史袁錠鹽運  
使何士英指揮范智交章薦岳起爲南城令以舊官  
復任改南豐令其爲令祿薄不足用常于官舍種蔬

以自給家人或有愠色輒曰不猶愈于充軍時邪無  
不意滿正統四年夏五月秩滿至京欲告歸會刑部  
侍郎薦岳于朝遂擢桂林守在郡五年廉慎之操愷  
悌之政終始如一以年踰七十致其政而歸景泰三  
年終于家享年八十有四

### 趙毅

趙毅字孟弘汝陽人尚書好德子也博雅多才凡六  
經子史天文曆數等書無不精詣善屬文工草書頗  
有晉人風度隱于鶴庄與處士張一中金子齡時相  
過從忘情勢利永樂初徵爲工科給事中歷工部左

侍郎 太宗嘗召與語隨問進規多見采納一日

上召侍奕時盛暑亭午流汗浹背卽以手中扇賜之無何以內艱歸起復原官兼詹事府少詹事上欲作木牛流馬問羣臣無應者毅獨得其法就便殿製之能行數步 上曰昔武侯因蜀道之難作今四海一統舟車之便安用此爲並其法納于內府八年奉使交趾卒于途

尙 褫

尙褫字景福羅山人中正統己未進士初授行人擢南臺御史會掌院都御史周銓貪污不法褫偕諸御

史范霖等合疏劾奏銓下詔獄銓亦奏辯諸御史俱被逮會銓遭病卒禠得謫雲南驛丞量移豐城知縣爲邑豪誣繫憲獄處士吳與弼以詩解之禠用是名重海宇

强 宏

强宏字士容汝陽人天資明敏書過目輒成誦登正統壬戌進士拜監察御史彈劾務存大體不矯激以沽直會 景皇帝命監京畿兵馬保障山東紀律嚴明虜不敢逼陞山西僉事陝西副使致仕歸闔門養重時論高之

楊威

楊威字冲儀汝陽人父璽洪武間爲歸安令有善政  
威生而穎異日記千言領景泰庚午鄉薦授霸州訓  
導抵掌談世務切抱隱憂天順初陳十事多見采納  
明年又上疏劾本州官寮貪庸盜賊縱橫不能制遺  
禍將來當必不小侃侃千百言不報後數十年大盜  
劉六等果起霸州卒如所慮四年遷武鄉教諭五年  
復上疏陳五事其一論軍政謂徙戎狄于內地于計  
非是亦未報雖當路嫌其抗直而識者韙之九年遷  
永平教授不赴歸年七十卒子元方榆次知縣孫世

祥嘉靖丙戌進士祁門知縣

徐廷璋

徐廷璋字公器羅山人性豪邁有才畧登景泰辛未進士拜刑科給事中時錦衣指揮門達有寵橫恣羅織卽大學士李賢幾不能免于虎口事敗上命廷臣會鞠廷臣夙畏達無敢言者廷璋忿然叱校士刑之達乃伏辜由是直聲震于中外累陞都御史巡撫寧夏寧夏故無邊牆套虜數入廷璋始修築塹山湮谷長數百里迄今以爲保障

李嵩

李嵩字文明汝陽人父縉吉安府通判以故得從楊  
文貞公游博極群書領景泰癸酉鄉薦除辰州同知  
城麻陽黔陽兩縣民不知擾洞苗以爭田相讐殺嵩  
單騎詣洞片言解之苗夷讐服競奉金寶爲壽悉却  
不受九年秩滿民夷交奏復留三年擢鎮遠知府嘗  
行部遇虎正色端坐了無畏怖虎乃去無何以致仕  
歸經女兒澗風濤暴起舟且覆嵩仰天祝曰嵩居官  
不敢欺天罔人如有之天覆吾舟須臾風止抵家發  
篋惟圖書數卷日以自娛雖餽粥不充怡如也所居  
舍壞太守欲爲修嵩不聽年八十卒子舉鄜州知

州

胡智

胡智字尚明光山人成化丙戌進士歷戶科給事中  
數上封事彈劾時宰念其親老一旦乞歸旣登途忽  
聞父喪一痛幾絕匍匐抵家而母亦卒智哀毀骨立  
幾不能生服闋或勸之官智曰吾親旣歿更出何爲  
乃扁其堂曰知足自號雲山道人築精舍于城南百  
里之外白沙關竟日掩扉靜坐玩易如此者二十有  
八年丁巳元旦禮拜天地畢公服端坐而逝自通籍  
以來凡俸金租餘悉以贍宗黨之貧者不私尺寸以



遺子孫其忠孝大節恬退高風真有超乎流俗者矣

### 熊翀

熊翀字騰霄號止庵光州人少齡業南壇從遊者十人許忽夕覩一絕色女立松樹上衆皆錯愕走翀畧不爲意女滅焉遂以刀刮樹皮大書曰作怪風雷折成形斧鋸分夜半雷劈之至今人猶能道其事登弘治己丑進士授武進令濯瘼煦寒無毛髮點染稱循吏擢爲山西道御史按陝西武臣橫強發其甚者如指揮王昶輩置之法按江西蕩夷凶慙不少假借貪墨望風解去而釋死刑之寃者爲多刷卷南畿以考

最陞山西憲副且詔以天下官員都照依熊狎其  
受知于朝廷如此分巡冀北道擒白蓮會謀不軌  
者萬衆惟戮其首妖王良輩而脇從者免陞按察使  
正德庚戌督工張秋陞都察院僉都御史多茂烈又  
被欽賞無何陞副都御史節鎮陝西均徭額興錢法  
刺奸植良紀綱振肅入邊夜見寶氣上轟命掘之得  
古玉璽一顆文有受命于天既壽永昌八字納之上  
是年以工部右侍郎召無裨者不泣下而遮留者行  
間改兵部侍郎立朝抗顏多建白時大司馬馬文貞  
公名譏然而侍郎有左熊右熊京輦有兩熊夾一馬

天下太平之謠 孝廟呼熊鬍子而不名一日奏事  
鼻帶液 上曰鼻液乃膝寒耳命以宮繡護膝賜之  
滿期加正三品服色俸廕一子入監年七十擢南戶  
部尚書遇兩宮慶禮成得特進階資政大夫正治卿  
上柱國時七十有二矣丐休詔許馳驛歸累官要樞  
家居絕無秘玩但藏古書千卷所製奏疏與詩文有  
止菴集行于世

李鸞

李鸞字廷儀確山人成化己丑進士授南京刑科給  
事中正色立朝風猷特著時中官竊柄中外軀硯鸞

抗疏奏彈竟爲所構謫判秦州量移上海令廬州通判任真推分曾無幾微見于顏面以內艱歸遂用懸車廳事僅容旋馬夫人猶然布衣清風凜節當于古人中求之矣

胡瀛

胡瀛字孟登羅山人成化乙未進士授餘姚令明敏廉介有應變才適日本夷來朝所過騷然瀛預市瓦器以魚菜餅糗至卽給之夷得飽殊驩皆踴躍去歲饑悉發廩以賑猶弗給乃節量溫飽令饑民傭食富家多所全活仍奏免田租之半時監儲督折銀甚

急瀛罷弗徵坐罰俸又弗徵明年秋成始下令徵折銀民皆兢入曰勿復累我侯也有爭燭湖水利者積年不決至操刃相向瀛爲分水均其灌溉遂解居數年以憂去服闋改武進尋擢南京戶部主事員外郎以忤權貴謫興國同知遷浙江僉事自度與時不合遂致仕歸子止進士官御史能世其家聲云

### 高鑑

高鑑字克明信陽人第進士爲武選司主事崇王旣之國汝寧請置守備大司馬謂信陽已置守備難其手鑑曰是無難也卽移信陽于汝寧俾兩備之便遂

著爲令尋以事忤中貴人逮謫鎮遠通判適洞夷相  
讐殺督府檄鑑往輯之不服鑑乃夜徙居他山供帳  
如故遲明則臥榻已椎碎矣鑑從容束帶出帳中議  
事羣夷望而神之皆叩首伏遷鎮江同知夔州知府  
甫一載致仕歸鑑體貌脩偉才器磊落善談辯曉音  
律詩書圖畫自成一家云

閻倫

閻倫字天敘息縣人弱冠舉于鄉父歿哀毀骨立及  
塋遂築室于塋側居之晨夕悲號哀感行路登成化  
戊戌進士歷官禮部郎中清慎端敏以疾乞歸加叅

議服色累徵不起卒祀鄉賢祠

曹鳳

曹鳳字鳴岐新蔡縣人生之先日母自外歸見火光如車輪當其前明日鳳生生而靈異書過目輒成誦成化十七年登進士爲祁門令九年擢監察御史當弘治改元之初鳳持風裁崇論正議多所嘉納偶奏事失儀鴻臚糾舉上特宥之謂左右曰此曹御史也好官當畧其細過五年巡按江北劾罷太吏貪墨望風解綬以抗直不容出守蘇州蘇富饒甲天下俗尚奢靡爲定婚喪禮不得過制一切務從儉素法在

行當時各郡莫不推先蘇州者陞山西左叅政湖廣右布政擢都察院副都御史巡撫延綏正德初召還京師逆瑾方用事賄賂公行諸部院見者多長跼稽首鳳故不見及見又長揖不拜一無所贈送瑾不喜乃問曰都御史知回院故耶鳳曰聖恩也瑾曰何以報稱鳳曰振肅紀綱激揚淑慝耳時瑾嚴勘天下錢穀以中傷不附已者勘官希瑾意言延綏布糧汜爛過緣主者鳳適丁外艱所司奏鳳當守制瑾乃罷其官聽勘竟誣鳳償布五百疋粟千石鳳鬻產完報瑾怒猶未解也鳳積忿一日無疾端坐而逝明年



瑾誅 朝廷憫其忠遣官諭祭且給金營葬事孫亨  
工部尚書別有傳

程 文

程文字載道確山人少聰穎異常兒未冠舉于鄉登  
成化辛丑進士授舒城令民詠歌之擢南臺御史累  
遷太僕寺卿南京右通政使屢疏劾逆瑾皆留中不  
報歷仕三朝以忠謹著稱居憂時兩臺以河夫積剩  
千金爲贖文毫無所取盡留民間且輸粟捐金賑歲  
之荒其高義如此

張文佐

張文佐字良弼西平人成化甲辰進士累官山東叅政父淵邁疾顓天所代疾遂愈後天年終徒跣哀號旣絕復甦及塋身自肩輦而行遂廬墓側負土築坎高數尋手植松栢千餘株哀勞過度忽感疾夜夢異人賜以藥方醒合服之卽愈後居母喪亦廬墓三年墓左產靈芝三本色赤如鷄冠事 聞旌表其門

### 李遜學

李遜學字希賢別號悔齋上蔡人自幼聰穎嗜讀書成化丁酉中河南鄉試丁未舉進士改翰林院庶吉士弘治己酉授檢討充經筵官丙辰陞浙江按察司

僉事督理學政敎人因材造就每試封卷置號手定  
甲乙預決中式名列後悉如其言私請一無所售時  
皆服其識鑒未幾以憂去諸生送之水許多泣下者  
辛酉服闋改陝西提學遷副使甲子丁內艱丁卯復  
提學山東戊辰召入爲太常少卿己巳以少卿兼翰  
林院侍講署詹事府事秋八月開經筵進講虞書一  
章詞懇音暢左右聽之聳然庚午陞戶部右侍郎是  
冬改禮部又明年轉左乙亥拜南京禮部尚書踰歲  
以齋聖壽表至留爲禮部尚書凡祀享朝會諸儀必  
考古據今行之唯謹尤務持大體不爲文義所牽制

屬吏有以節孝當旌門而于例少礙爲請曰此勵俗之具其亟行之無拘拘也用心之厚多此類丁丑夏五月命以尚書兼翰林院學士仍掌詹事府事上恩遇日隆前後屢賜玉帶蟒衣及文綺寶鏹諸物至是引疾乞歸甚力章凡九上輒蒙溫詔褒答聞命益知感激強起視事戊寅冬以疾卒於官

### 熊 槩

熊槩字大節商城人成化丁未進士授南京戶部主事遷員外郎中優游郎署者十年屢覈錢穀毫無覲覷人服其廉出守臨洮地當夷夏河西諸鎮皆取辦

于此槩悉心經畫咸中機宜隱然若長城焉以疾請告歸卒于家

盧 藝

盧藝字士能息縣人居家孝義五世同居成化中以里選歷都察院司務戶部員外郎時陝右大饑奉勅往賑區畫多方軍民數萬賴以全活陞太僕少卿未就卒于途賜祭塋祀鄉賢祠

劉 紳

劉紳字大用汝陽人成化戊子鄉薦第一登弘治庚戌進士拜監察御史 孝宗嘗欲差緹騎逮繫郡守

紆疏諫止之出按京畿山東風采凝重群寮憚服每  
治死獄必委曲求其生路至志寢食曰吾以盡吾心  
也遷山東按察副使釐奸剔弊不著風猷辛酉致仕  
卒于家

### 何景明

何景明字仲默號大復山人信陽人也生有異質穎  
敏殊絕八歲時卽能賦詩爲文章年十二以父仕臨  
洮驛丞乃隨侍臨洮守李紀者聞其奇召置門下甚  
愛幸之爲延師授春秋居頃之卽善說春秋年十五  
魁河南省試諸王公大人爭迎致一見候車常數十

乘所過觀者如堵既入京師遊太學祭酒林公又甚  
愛幸之年十九登弘治壬戌進士授中書舍人是時  
北地李獻吉武功康德涵劇杜王敬夫歷下邊廷實  
皆好古文詞景明與獻吉又駿發齊名憂憤時事尚  
節義而鄙榮利並有國士之風其文類國策史記詩  
類漢魏盛唐于是明興詩文足起千載之衰而學士  
家稱曰何李屹然爲一代山斗云在中書時自館閣  
諸縉紳與四方學士人人願見車馬填門巷不絕而  
景明德性醇明言儀雍雅杯酒談笑間詩文立就作  
字復秀拔奇勁迥出常格一時聲傾都下顧高潔不

妄交游錢寧欲與交驩間持古畫求題景明曰此名  
畫無汙吾題留一年終不與題是時寧賜宗姓晁寵  
貴弄權景明顧奴視遠之會乾清宮災應詔言便事  
乃極言邊軍番僧義子數事義子者斥錢寧也疏留  
中不出師御史客死京師權倖廖鵬者賄之棺謂可  
結縉紳謹也景明日御史生不苟受奚爲受汙地下  
邪乃約所知共賄金斂之竟却其棺後督學關中會  
鵬弟鸞鎮守關中恃勢益橫諸叅隨者遇二司不下  
馬乃執叅隨者撻于市責數之諸叅隨始人人斂避  
矣先是逆瑾撓吏部權則移書許太宰引正大義獻



吉與姜御史詰奏又移書楊太宰直獻吉獄少師李  
西涯疏上乞休會有兵事又援古大臣義爲書讓之  
三書皆非身事而抗言尊顯語涉時忌議者謂憂國  
憐才古人莫加也顧獨以不能干謁守中書十年不  
調官然志在經術世務終不言功名事說五經義與  
諸家訓詁多殊方欲刪繁折衷成一家言顧三十九  
而卒志業竟不及就景明使滇南不持滇南一物臨  
卒時餘三十金篋中耳所著何子十二篇詩歌千餘  
首書疏騷賦序記銘贊雜文數百篇盛傳當世

李  
緋

李排字廷章固始人弘治乙丑進士爲戶部郎司儲  
薊鎮適武廟南巡度支浩繁排悉心經畫事集而  
民不擾又推其餘以贍貧士之婚喪不能舉者邊士  
懷之歷江西按察副使儲直指獨薦其才堪巡撫後  
果進都察院副都御史總理河道所至有治聲家居  
好行其德遠邇慕義繼母年老喪明事之如嫡前輩  
風猷大都若此

林時

林時字懋易號介立山人正德庚午舉河南鄉試第  
二丁丑舉進士爲翰林庶吉士己卯授檢討尋以內

艱歸壬午起復會修 武廟實錄爲纂修官乙酉實  
錄成進編修爲經筵官丁亥擢國子監司業辛卯改  
南京通政使司右叅議甲午擢右通政乙未改提督  
膳黃會繼母喪歸遂卒壽四十有五時幼奇疑穎悟  
絕人六七齡讀書一目成誦大父卒值家中饑時甫  
九齡或日一食或竟日不食讀書不輟名翹然起後  
爲舉人則有郡守畢公昭間周之畢重其學每夕必  
輕輿造訪所居不容輿必踵就爲與論古今常變經  
史信疑及在館務學益勤劬每讀書夜半爲文深思  
不苟會議大禮忤旨與同官俱逮獄杖三十病踰月

乃間 武廟實錄且成惟迎立 世宗等二事未決  
衆議紛然時奏記副總裁中峯董公曰昨聞迎立一  
事或云由中或曰由內閣誅賊彬或云由張永或云  
由楊廷和疑信之間漫然無據竊意廷和以忤旨罷  
歸永坐罪廢 今上方綜覈名實書進二事必首登  
乙覽恐將以永真有功廷和真有罪不待左右汲引  
排擯而君子小人進退之機決矣董公以白之總裁  
鵠湖費公可之書進 天子由是傾心任宰輔而宦  
寺之權輕矣爲司業立十二會選博士堂官文行優  
者六人分領之月終稽核親爲改正諸生中有悍惰

久不至者一切繩以法曰朝廷法非吾意也異日有持當路之親面抗者曰吾以司業治監生非治當路也爾何抗痛責之已而閣老有遣祭文廟者作詩得御和遂立石于廟時曰不可文廟具瞻之地一物不可損益况有聖製可輕舉耶事遂寢及孔子祀典成有欲上表稱謝者時曰吾既不能正又從而謝之人其謂何事又寢亡何慎選師儒之議起上疏請休上下吏部覆奏得留京別用之命已乃改陞南京國子監祭酒在南公事殊簡升堂後寂如也暇則取諸經傳閱之作文賦詩亡虛日嘗著介立子未就會憂

歸焚焉初奔喪急途中積熱十月疾作謂子宏等曰  
吾所爲爾曹極知之能勉于爲善吾死亡恨矣天下  
事平生儘有志卒不能一爲命也當復奈何越十二  
日遂卒是日大風霾汝人聞者皆曰泰山頽矣至有  
憤惋泣下者

### 王相

王相字夢弼光山縣人辛酉中鄉試正德戊辰登進  
士初授淮之沐陽令沐陽邑僻民貧公帑無夙積會  
歲且大饑民日流移百方求所以濟荒者因請官錢  
數千緡賑之躬親計口面給焉全活甚衆逆瑾用事

嘗變賣鹽引及沐陽相乃白之當道謂舟楫不通百  
家之產未足以當千引之費後竟事寢時山東盜起  
近遠騷然乃築城廓浚池隍練民兵由是盜相戒莫  
敢入境者比啓行沐民老弱泣隨者相望未幾拜山  
西道監察御史獨持風裁門無私謁及領湖湘清戎  
之命乃更飭法令定立條格使官吏有所畫一用是  
軍政肅清奸猾屏迹嗣後奉勅閱城池驗軍器凡湖  
山隙地道所出沒者悉令脩築以爲捍衛斷府往嘗  
作看花樓于城隅至侵及池隍爲魚沼相一切按之  
以法始還其舊凡羣小憑依狐鼠者必懲之不少假

借時邊將多羅織平民指爲奸細以冒功者無慮三百人相知其寃將奏聞于朝邊將懼乃賂權勢冀獄成以掩其詐且遣人恐嚇之而屹不爲動尋出按山東風采視昔益倍先是臨清地衝要設鎮守太監一又各倉場設至五六有司供費動以萬計軍民病之相按臨初卽會議以聞辭甚懇切而又榜之衢市以示禁約由是有司不敢過于奉承無賴不敢恣于無忌而不便者羣起而謀中傷之矣後果被逮補判高郵州東人號泣遮留者無異沐陽也方從容就道病作未幾卒年僅四十有九相孝友天植睦族周筑居



官垂廿年未嘗爲自私計不經之事未嘗一出諸口  
有奏議詩稿若干卷藏于家 世宗卽位贈光祿寺  
少卿諭祭一壇有司奉其主從祀賢祠

許達

許達字汝登河南固始人正德戊辰進士仕至江西  
按察副使宸濠之變不屈被害贈刑部尚書謚忠節  
長身巨口猿臂燕額沉靜有謀略初爲樂陵令期月  
令行境內辛未春劇賊劉七齊彥明颺起圻甸焚屠  
城邑殺戮長吏達先築城浚隍貧富差工越月而成  
文使民各起墻垣高過其簷仍開墻竇如圭才可容

人家令一壯者執刀伺于竇內其餘人皆入隊伍令  
曰守吾令視吾旗鼓違者有軍法首功者上賞又設  
伏巷中洞開城門未幾賊果至旗舉伏發賊火無所  
施兵無所加盡擒斬之自是賊不敢近樂陵城撫院  
交薦其才超陞山東按察僉事兵備于武定州是時  
劉齊二寇猖獗自陝以東橫行而武定城圯隍夷不  
格牛馬民欲奔去力定之壬申五月劉七楊寡婦以  
千騎犯利津追至高苑縣斬首四十有八未幾賊以  
百騎劫德平復追戰于楊二莊一鼓盡勦平之自是  
賊南奔狼山颶風敗舟乃滅尋陞江西按察司副使

是時寧藩宸濠陰謀不軌下結姚源華林諸賊據有其財上賂要寵鉅權諸門陰附其勢睥睨神器四海共聞而不敢言達言于巡撫諸人欲剪盜以孤其勢諸公皆固拒之踰年宸濠滋橫迫脇撫鎮保薦賢孝逆跡已露臺諫論劾詔差官往問且宣諭焉宸濠惶懼乃以六月十三日諸司進慶誕辰因大享之明日入謝宸濠遂颺言曰 太后有旨召我如何孫公曰願出旨以示又特問曰許副使如何曰天無二日國無二王副使惟有赤心耳宸濠怒曰我不能殺汝邪曰汝能殺我天子還能殺汝特先後間耳遂令僧人

執達暨孫公以出顧謂孫公曰達疇昔之言正爲有今日耳達嘗與孫謀先發後聞也遂遇害于惠民門外時盛暑尸不臭蠅蚋不近數日容顏猶如生達父方家居聞江西有變殺一都御史一副使便爲位易服而哭人怪問之曰此必吾兒也吾兒素志如是故知之

### 蔡翠

蔡翠字羽秀固始人徙家光州正德丁卯舉于鄉授高苑令端介不阿政崇節愛毫無所取于民境內河溢爲害築堤捍禦迄今垂百餘年人猶思之曰蔡公

堤與上官一言不合遂賦歸來卜居潢水之西蕭然  
獨處與世無預自號樂丘先生鄉人重其高潔

馬錄

馬錄字君卿信陽人正德三年進士授固安知縣縣  
當南北衝劇號難治錄嫻習政體周察人情廉明惇  
信士民悅服踰年有異寇之亂襲破固安錄被執寇  
見臥內無長物乃賢而釋之獨縱其獄囚去囚曰我  
輩罪宜死幸毋竄以累吾慈父也復相率詣獄再踰  
年徵拜監察御史督理山東馬政以內艱歸免喪出  
按江南嘉靖初遣使捕高唐州官屬連坐者五百餘

人中外大駭錄上疏極諫 上從之六年按山西姦

人李福達事覺錄捕抵法初福達以丹術干武定侯

郭勛勛奇之相與頗密及被繫勛乃移書請貰錄大

怒劾勛庇姦亂法勛惶惧入辯 上疑以屬三法司

于是刑部尚書顏熙壽等會鞫俱如錄擬而給事中

王科等御史高世魁等二十五人各又奏論勛先後

十餘疏 上以人言衆愈疑而左右又有爲勛言者

乃令福達并勘官俱至午門以兵部左侍郎張璉署

都察院禮部右侍郎桂萼署刑部少詹事方獻夫會

審璉等鍛鍊傳會盡改原擬錄與都御史李璋等坐

故入俱謫戊王科等坐挾私彈劾俱編氓福達釋歸  
勛置不問羣論皆爲之不平

孔輔

孔輔初名孟富字道充汝陽人幼以神童稱登正德  
戊辰進士授中書舍人遷刑部員外郎鞫刑明允

上覽其疏賜名輔蓋以公輔期之也已卯上將南  
巡輔偕同舍郎孫鳳等伏闕諫被杖幾死尋出爲松  
江守丁內艱復補辰州世宗改元大褒諫臣得進  
俸一級又以外艱歸起補廣南便道抵里卒輔天資  
穎異積書至萬餘卷過目輒不忘所著詩文甚富而

子姓零落不少概見人共悲之

朱紀

朱紀字維憲固始人天性孝友父本患中結用管以口吹無難色嘗夜失牛家人逐盜已獲乃舊識者縱之不問以子冠貴封御史正德七年霸寇至紀于蔣家埽結義兵拒之斬賊黨七人賊怒四面環攻力疲遇害事聞贈光祿寺少卿

郭五常

郭五常字大經西平人正德辛未進士授大理寺評事武帝南幸上書切諫罰跽門五日杖之八十謫



通政司知事嘉靖初復原職恤刑陝西多所平反陞  
萊州知府廉介自持萊人繪祀楊震祠中起補鄖陽  
鄖人爲立甘棠碑累陞山西行太僕寺卿調停馬政  
屢奏邊功欽賞有鑑金文綺之賜以入覲卒于京邸  
飲量兼人與客縱飲松林之下客皆僚倒乃呼松爲  
伴一松一竿飲可八斗人謂風流無減晉人云

### 楊來鳳

楊來鳳字從儀汝陽人正德甲戌進士授會稽縣令  
以政最擢山西道監察御史時上將南巡來鳳同  
諸御史疏諫上怒杖于闕下幾危出按陝西事未

竣以病告歸杜門養重尺牘不入公門衣乏羅綺行  
不輿馬猶然一寒士也清風高節汝陽人至今仰之

### 桂祥

桂祥字子和汝陽人幼而孤奉貞母之訓讀書攻苦  
罔間寒暑正德丙子領鄉薦授慶陽推官因母不習  
北地苦寒疏請改教不報居官廉直數有平反嘗雪  
史揮使之獄揮使懷千金爲壽祥力却之遷泗州守  
有惠政以皇陵功階四品尋擢工部員外郎欲得  
當以報國顧太夫人春秋高矣遂乞終養奉母歸無  
何太夫人卒祥哀毀泣血頭鬚爲白竟成疾不起生

平嫺于詩文所著有北地泗上諸稿行于世

### 馬 敷

馬敷字子抑上蔡人長軀劒眉豪宕不羈然有忠孝大節登正德辛巳進士需次銓曹念母孀居卽上疏乞終養未許授兵部主事改南臺御史數上危言以定國是有吏部尚書王瓊者正德時節制三邊邀功喜事肅皇龍飛業加譴責斥逐之矣無何寅緣復起敷率諸道御史疏諫數瓊大罪者十乞罷黜以謝天下上怒令緹騎逮敷等至闕下杖問諸御史有死者敷始終無撓辭中外服其壯烈謫判興國州

遷蘇州太守蘇故劇郡且繁于獄訟敷雄才敏斷處  
之裕如暇則與學士大夫登虎丘泛太湖杯酒嘯咏  
悠然遠致遂起新亭之嘆兼有所觸一旦解印綬歸  
日從朋舊爲泉石游不復問人間事所著有蒼臺集  
行于世

蔡光

蔡光字汝謙本饒州人其大父斌天順間司訓光山  
因家焉光生而穎異十三齡從其父與王文成公論  
良知力行不合從旁曰能行詎非知也文成驚嘆嘉  
靖己酉舉于鄉授江華令禁溺女毀淫祠禱泉泉湧

禱虎虎伏政聲爲諸邑最壬申兩臺疏薦卓異加州  
守銜調寧遠寧饒十倍華而光躬行節儉三月而寧  
治屬入覲上安邊四事疏乞終養不報俄以艱歸服  
除擢兗州郡丞尋調臨洮遂乞身歸歸而布袍杖履  
深居簡出惟與諸子弟及同志講學不輟其學以靜  
而入以敬而存開來繼往無愧西山文肅之裔一日  
疾作衣冠拜家廟朗吟含笑而逝邑人爲立默齋先  
生祠所著有光山志寧遠志中興頌諸書後以子翰  
林院檢討毅中貴贈奉政大夫

本朝分省人物考卷之九十二